

高平縣志

知高平縣事龍汝霖纂輯

食貨第四

方輿勝覽稱高平四面皆山中有平地然土瘠民衆無可得食不待勸相而自勤開墾凡礮确不毛闢爲糞壤無隙地矣夫乘以開方之法地方一里爲田五頃四十畝地方十里爲方一里者百爲田五百四十頃高平絕長補短不足九十里而山廣於地重以城郭宮室塗巷川瀆沙礫故明季稱民屯田凡七千五百四十頃八十九畝二分有奇房基地一百二十頃六十六畝五分有奇不徵糧徵糧地

高平縣志

卷四

食貨

一

實七千四百二十頃二十二畝七分有奇故志則稱國初民田上地一千二百九十一頃八十三畝一分三釐中地五千五百八十八頃三十四畝七分下地三百九十九頃七十五畝六分五釐下下地八十頃四十二畝四分三釐屯田四十五頃三畝八分八釐有奇順治增一十二頃七十四畝康熙增二頃八畝八分三釐有奇雍正增十一頃七十畝二釐有奇乾隆增四十四畝五分一釐民屯田凡七千四百三十二頃三十七畝二分有奇視明季僅增十二頃十四畝五分有奇今存民屯田七千四百三十二頃十五畝七分有奇視乾隆時顧少二十一畝五分有奇

自秦壞井田開阡陌兼并僭越之患興先王平土之規蕩然無復存矣漢興欲限名田以抑制之輒梗於豪右周隋立均田之法而勢未能久唐制一夫授田一頃八十畝爲口分二十畝爲世業而聽其買賣官執契券以徵其直兼并之風遂牢固而不可拔開元時宇文融倡括田之令五代踵之吏緣爲姦宋初始除其苛仁宗立爲限田旋亦罷廢迨王安石行方田賈似道買公田而宋祚以亡明興覈天下田爲魚鱗冊圖其田之方圓大小次書其主名與田之四界貼脚詭寄之弊漸除今雖循用其冊而佚其圖歷年旣久詭寄隱匿復不可究詰重以隱墾占田不復升科

高平縣志

卷四

食貨

一一

沙坍水漲不以時蠲除而買賣推收富民操勢乘貧者之急或田鬻而名留人非而籍在紛紜糾轄而魚鱗冊籍爲虛余著爲令凡買質田產者無論年之遠近歲於徵納時舉其名爲更易之曰過割禁糧吏之苛索畝以十錢爲率浮者以贓論同治四年更者二千七百餘頃五年二百八十餘頃後之失地而詭名者可少減矣若失地積年追求無著則又非假以歲月行度田之令均丈之法未易甦此宿弊也

周官生齒有登漢制隱口有罰司牧亦以安撫招徠爲殿最重戶版也魏晉以降戎寇不息民多僑寄東晉遂以庚

戎爲土斷猶今日土著也隋定貌閱以隱覆脫漏雖戶數驟增抑異於尹鐸之治晉陽矣唐初令民始生日黃四歲曰小六歲曰中二十一曰丁周世宗更定爲逾三千戶曰望縣逾二千戶曰繁縣以次爲差宋稍增之而分曰主戶曰牛客曰小客明興立黃冊十年一編民始生日未成丁十六曰成丁凡二等 國朝因之然嘗厯考冊籍凡生值聖隆其時輕徭薄賦災沴不生則戶口殷若理道乖方橫征暴斂喪亂隨之則戶口耗其大較也邑戶故志稱 國初中上則丁一中中則丁二中下則丁三下上則丁一百十三下中則丁二萬二千九百有二下下則丁一萬五千

高平縣志

卷四

食貨

三

九百有七凡三萬八千九百二十八順治十二年增二千五百二十八十四年增一千七百四十四康熙五十二年定爲制續生人丁永不加賦五年惟一編審而停歲造乾隆五年復停編審以保甲丁額上諸部嘉慶十二年戶凡四萬九千一百九十男女口凡二十三萬八千三百八十八同治五年戶凡五萬六千一百八十男女口凡二十五萬七千三百八十五蓋二百數十年間 聖聖相承恩德無已中原雖困兵革高平僻處偏隅兵燹不及休養生息人物滋豐編審法寬小民復不畏徭役無減匿隱漏之弊然匡翼安集不又在縣尹與

古者公田籍而不稅自履畝行田賦用而法制以禁暴秦  
貢賦之則二十倍於古貧民耕豪右之田更稅什伍爲後  
世傭耕所自始漢興量吏祿官用以賦於民什伍而稅一  
後更三十而稅一取民之制爲輕晉亦畝稅米三升後復  
減其一隋高頴建輸籍之法而浮客歸於公賦故隋世庶  
富踰於前代唐初定爲租庸調法凡授田者歲輸粟二斛  
稻三斛謂之租合於古者粟米之征卽楊炎變爲兩稅庸  
調賦錢而租仍出穀制猶未盡改也宋建隆遣使監輸民  
糧元成宗命秋稅輸租明初秋糧輸米豆與前代猶出一  
轍至嘉靖行一條鞭法田賦始舍粟而專用銀所徵非所

高平縣志

卷四

食貨

四

出窮民至倍折以求納而銀之在天下者復日消日耗遂  
爲賦法之一大變邦計民生日以困窮而不救 國朝取  
民之制上地畝徵糧七升中地畝徵糧四升六合有奇下  
地畝徵糧二升下下地畝徵糧一升石凡准銀九錢六分  
一釐有奇民田凡七千三百八十七頃三十三畝三分有  
奇折徵銀三萬四千四百三十五兩八錢有奇合地畝九  
釐銀六千七百四十三兩六錢二分有奇驛站銀二千七  
百八兩二錢六分有奇明萬厯增絲絹銀一百七十一兩  
六錢匠價銀三百九十兩六錢歲凡徵銀四萬四千三百  
二十八兩四錢一分四釐有奇至屯田畝徵糧三升三合

有奇石准銀八錢凡田四十五頃三畝八分有奇歲徵銀一百二十一兩四錢六分有奇不與焉夫唐宋稅糧恒有破分卽明萬厯以前亦僅八九分爲率至張居正當國徵收以十分考成而民力殫矣加以飛灑隱漏之弊滋小民恒巧斲以避賦黠者田連阡陌或無絲毫貢於國愚者無立錐轉貼子女以償公家之賦無已則逃亡而族黨受其追呼甚則戶頭輸之什排輸之里老地方輸之以不知誰何之人而代納其賦苦樂不齊未有甚於今日者也抑又聞陸贄之言曰蠶事方殷而輸縑農功未艾而斂穀有者急賣而耗直無者求假而費倍唐時趣斂之弊已如此今

高平縣志

卷四

食貨

五

司牧者以苟媚長官爲賢以先期率辦爲能東作猶賒督收敦迫假笞箠以立威至有瀝膏血鬻田宅以供輸送者而赤貧之戶奔迸不暇雖敲扑無以應其求非勒豪差借墊卽抑戶頭代賠豪差墊懦民旣苦於倍償戶頭代頑民更安於逋欠而戶頭之家立破矣戶頭破則邑無富民不幸而有旱澇之灾將何以善其後耶

周秦無戶口之賦商鞅雖變法月爲更卒已復爲正不過一歲戍役三十倍於古而已漢初始算賦爲丁錢所自始而踐更過更卒更之制如故也魏晉戶調大率輸以綿絹周隋因之然役法尚存唐初有家則有調有身則有庸制

猶古也至兩稅興以資力定稅而不問身丁以錢輸稅而不納布帛錢重貨輕故陸贄白居易李翱楊於陵諸賢歷言其弊元和以後漸復舊章至宋熙寧元祐間差役雇役遂相勝而未有已明洪武均徭一編以戶計者曰甲役以丁計者曰徭役上命非時曰雜役皆有力役有雇役後以用度不節漸改折色迨條鞭之法行丁役悉輸以銀雖較十段錦爲簡便易行而銀荒之患更甚於錢荒求如昔時錢重之害猶不可得議者復思以錢權其歛散之宜亦擇禍莫若輕意也 國朝丁制仿諸明有丁無糧者爲下戶有丁有糧者爲中戶糧多丁少丁糧俱多者爲上戶中上

高平縣志

卷四

食貨

六

則丁一徵銀一兩四錢二分一釐有奇中中則丁一徵銀一兩二錢三分六釐有奇中下則丁一徵銀九錢六釐有奇下上則丁一徵銀八錢八釐有奇下中則丁一徵銀四錢四釐有奇下下則丁一徵銀一錢六分八釐有奇丁凡四萬三千二百歲徵均徭并顏料加增銀一萬三千一百三十四兩二錢七分有奇康熙增徭銀二錢二分八釐有奇乾隆初仿唐兩稅明一條鞭法丁併諸地曰地丁合徵銀五萬七千五百八十四兩三錢七分四釐閏年則加徵地丁銀九十四兩七錢五分有奇而屯田亦別徵丁銀三十五兩八錢九分有奇口賦夫徭悉出於田畝編審之籍

復停閭閻生齒蕃昌無賦於國民生之幸爲歷朝所未有然馬端臨有言唐之庸錢楊炎均入兩稅後世差役復不免焉是力役之征取其二也王安石令民輸錢以免役紹興以後所謂耆戶長保正雇錢復不給焉是取其三也合丁錢而論之蓋取其四矣吾願長民者其無忘丁歸諸地而於雜徭存其矜卹矣乎

羨餘肇於唐立爲賞格宋藝祖始罷之至明而火耗興焉後雖禁之而名益無藝康熙朝陸清獻知嘉定正銀兩酌收耗羨銀四分于清端知羅城民以田賦至者爲留數錢故二公爲國朝廉吏最雍正二年以山西巡撫諾岷言

高平縣志

卷四

食貨

七

詔以耗羨歸公文武養廉各項公費取給焉收浮毫忽罪無赦亦救時之良法故時謂康熙朝無耗羨有清官雍正朝有耗羨無清官以人皆可爲清官也高平正糧銀一兩耗羨一錢三分匠價不徵耗凡徵地丁耗羨銀六千四百十五兩五錢一分一釐屯糧耗羨銀二十兩四錢五分六釐然自耗羨歸公量受養廉而悉索供億日寢月長仍不足給官用後雖有耗外加耗羨外加羨之厲禁其勢固不止矣昔蔣襄平相國有言州縣不可使貧貧則賢者無餘貲無以行度外事不肖者更百端罔取諸民縱知而黜之被其殃者衆矣是又豈國之幸哉

後世是食足兵之政莫善於屯田自漢文募耕塞下武帝屯田渠犁趙充國留田先零皆以扈邊而實儲西漢魏晉漸廣衍於中土唐初府兵以實關巾屯田以備邊塞至開元大厯諸州競舉宋則兼行營屯之法大率營以民屯以兵明初令衛所置屯人種五十畝三分守城七分屯種歲收其粒爲官軍奉糧邊屯則商人佃種輸粟以准鹽課通商中鹽明太祖所爲維持屯政於不敝者也至葉淇改鹽課而邊屯壞衛所舊法亦漸隳 國朝中其制仍設衛所以分屯給軍丁以領佃迨經制兵立屯衛遂廢屯田仿民田以起科此邑屯糧所由起也惟運糧衛所尙仍其舊而

高平縣志

卷四

食貨

八

運丁騷擾復爲州縣之蠹則名實俱喪矣

明季匠役有二一曰坐匠隸大興宛平工部給食以供役者也一曰班匠畿外各匠量地遠近以班直京師者成化時輸銀免其役曰匠價高平凡輸銀三百九十兩六錢雍正初以年久丁絕除故名而更以新仍不便乾隆時始仿江西浙江入地丁徵之焉

唐憲宗分天下財賦以爲三一曰上供二曰送使三曰留州宋藝祖懲藩鎮之禍令諸州支度經費外凡金帛悉送闕下無得占留今之起運卽唐之上供送使也今之存留卽唐之留州也 國初輸府後輸司批注連環以杜假冒



寢批者罪之原額起運民田地丁銀五萬一千六百八十九兩五錢三分二釐耗羨銀六千四百十五兩五錢一分三釐匠價銀三百九十兩六錢起運屯田地丁銀一百五十七兩三錢五分二釐耗羨銀二十兩四錢五分六釐起運舊額存留驛站錢糧下剩等銀三千六百二十九兩一錢七分九釐實存留地丁銀二千一百八兩四錢一分一釐復輸顏料銀十四兩六錢一釐三成銀三百二十四兩二錢六分六釐減平銀九十八兩六錢九分五釐於司實留支地丁銀一千六百七十兩八錢四分九釐爲壇廟祭祀銀九十五兩五分三釐春牛銀五錢二分五釐行香講

高平縣志

卷四

食貨

九

書銀三兩九錢二分知縣俸薪銀三十六兩一錢七分七釐門子二名稍食銀七兩八錢九分六釐皂隸十六名銀五十一兩三錢二分四釐輿夫四名銀十五兩七錢九分二釐繖扇夫三名銀十一兩八錢四分四釐件作三名銀十一兩八錢四分四釐斗級四名銀十五兩七錢九分二釐快手八名銀三十一兩五錢八分四釐庫子四名銀十五兩七錢九分二釐捕役八名銀三十一兩五錢八分四釐民壯三十名銀一百四十二兩一錢二分八釐禁卒八名銀三十一兩五錢八分四釐監更夫五名銀十九兩七錢四分典史俸薪銀二十兩七錢四分門子一名銀三兩

九錢四分八釐皂隸四名銀十五兩七錢九分二釐馬夫  
一名銀三兩九錢四分八釐教諭俸薪銀二十六兩三錢  
二分訓導俸薪銀二十六兩三錢二分齋夫三名銀十一  
兩八錢四分四釐門斗三名銀十一兩八錢四分四釐長  
平喬村兩驛夫馬工料銀九百三十四兩九分七釐裁減  
舖司兵捐夫馬工料銀二十六兩五分六釐廩生餼銀四  
十二兩一錢一分二釐膳夫銀八兩七錢七分三釐孤貧  
冬衣銀五兩九錢四分七釐歲貢旗匾銀三兩九錢四分  
八釐膳錄書手銀六兩五錢八分云存留耗羨銀一千五  
十兩復應輸一成銀八十五兩酌減繁費銀一百兩三成

高平縣志

卷四

食貨

十

銀二百五十九兩五錢減平銀三十六兩二錢三分四釐  
於司實留支耗羨銀五百六十九兩二錢六分六釐爲知  
縣養廉銀五百三兩四錢六分六釐繁費銀二十六兩三  
錢二分典史養廉銀三十九兩四錢八分云昔漢宣帝詔  
曰吏不廉平則治道衰今小吏皆勤事而奉祿薄欲其無  
侵漁百姓難矣其知本之言哉漢建武晉泰始唐開元宋  
乾德明永樂皆以增吏祿而崇化本今賦祿旣媮薄女網  
密而罰奉日滋近復三成減平以折抑之無已之苛斂有  
曰常攤曰暫攤日增月異而贈賄供張之數益不可紀極  
於是貪黷者得以爲詞非侵蝕官帑卽漁獵里閭雖脏穢

狼籍無敢過問者吏道益雜而不可治矣

皇朝以仁立國取民之制最輕縱河工軍糈帑藏匱闕監於前明遼餉剿餉練餉之虐政未肯絲毫加賦於民偶遇偏災及省方萬壽慶典輒爲蠲租已逋或賑卹之而尤爲曠恩者則聖祖普免天下錢糧者一世宗初元免天下田租者一高宗在位普免天下錢糧者四輪免漕糧者三仁宗丙辰授受普免天下錢糧者一高平急公奉上歷無逋賦蠲逋之詔雖屢下惟庚戌年獲免銀七千六百九十八兩六錢有奇辛亥年獲免銀三千八百五十七兩四錢一分有奇乾隆六十年普免天下積欠高

高平縣志

卷四

食貨

十一

平以舊無積欠免次年正賦十分之二云

梁元勰有言聖人歛山澤之貨以寬田疇之稅收關市之征以助什一之儲古之征商蓋以摧浮淫兼并之徒而紓農也榷酒酤租六畜始於漢券田宅始於晉牙例始於元雜課之征由來舊矣高平酒課征銀九十七兩八錢閏月加征銀八兩一錢五分商稅兵餉征銀五百九十一兩六錢八分房田稅契征銀五十六兩八錢六分五釐盈餘約征銀五百四十一兩有奇溢額商稅征銀二百七十七兩六錢四分六釐盈餘約征銀四百二十三兩有奇閏月加征銀六十六兩五錢四分一釐畜稅征銀一百八十八兩

五錢四分九釐盈餘約征銀二百七十四兩有奇閏月加  
征銀一十四兩八錢七分一釐當稅戶輸銀五兩舊征銀  
三百五兩今征銀二百一十五兩鹽牙稅征銀二兩五分  
牙稅舊征銀三百三十一兩道光年繳其帖之廢者存帖  
四百三十八征銀三百七兩八錢數十年間籍存丁亡者  
復二百餘戶追呼所擾株及族姻族姻逃則鞭其里之約  
保約保貧無以應胥吏從而納焉逋負者蓋五六年矣同  
治五年爲繳一百九十三帖於部六年復繳帖二十有一  
今存者二百二十有四征銀僅一百六十六兩八錢云  
自漢武縱告緡錢有令閭閻錐刀之末莫不有征天下利

高平縣志

卷四

食貨

十二

權籠於上國用饒而黎民困矣利竇旣開唐建中有除陌  
宋熙寧有手實宣和有經制明有抽分雖薄有所入而稔  
怨旣深邦本亦撥 世祖入關首除明末苛稅與民更始  
關市之征制爲稅則民獲甦焉咸豐朝大盜薦興軍屯曰  
盛四方貢賦不以時至減百官之祿輟軍人常廩至鬻爵  
納粟猶不足贍軍用而抽釐之制行矣制初行於東南而  
小效山西則咸豐九年始有之曰坐賈曰行商行商收諸  
邊卡曰洋藥曰百貨委員領之坐賈收諸郡邑曰烟土曰  
烟館牧令領之嗣定爲五年比較法務取贏絀者罰有司  
益務爲深刻銖積絲累僅乃充額以求無失課最不肖者

或緣爲姦利故江南平臣工屢以停釐爲請司農以 國  
用未紓不允其議高平歲亦輸千數百金徵之民間恆苦  
不足以奉益之嗚呼後有君子其毋以無名之征權宜之  
制爲平世常法哉

千古權鹽之善無如劉晏法在去鹽吏而用土人權稅於  
鹽場而不問其所之鹽吏省則蠹蝕稀不問所之則私梟  
絕故國與民俱利後世屢易其法至明洪武初以山西行  
省言令商人佃種邊地輸粟於邊而准以鹽曰開中葉淇  
欲網天下之財利於是不以粟而以銀不於邊而於運司  
而鹽課幾敵 國賦之半計析秋毫網亦少密焉高平故

高平縣志

卷四

食貨

十三

食解鹽額銷九千一百七引嗣增二百二十七引凡七十  
七名九十四引計名徵大課銀五十兩雜課銀五十五兩  
公費銀十五兩羨餘銀八兩餉需銀六兩咸豐十年加費  
銀四十兩鹽一名重十二車車二十袋袋一百二十五觔  
計二袋爲一引一百二十引爲一名名凡二百四十袋准  
三萬觔值冬名益以五百觔自運城車運二百六十里至  
翼城馱運四百二十里至縣縣鬻鹽觔准錢三十二鹽課  
隸河東春秋時爲郇瑕氏地 國初有都轉鹽運使有巡  
鹽御史或置或否康熙時裁御史而以鹽法道屬山西巡  
撫曰鹽政道光以前高平故有商自官吏視簽商爲利藪

咸豐初商輸貲於國而免之改曰官運官乃募賈司其政薄收其息以給緝私之胥役貪冒者或獵取之不應則更其賈賈人訐於河東同治三年定爲令更商必自河東以束縛縣尹而忘悖官運官銷之制賈人亦遂挾其勢以短觔攬硝令不得詰詰則罪以懷私官鹽惡則蘆私充斥令更罣法網焉勢有偏重亦因所激而然也

禹別九州任土作貢凡物可持奉者曰貢盛於筐而進曰筐不常而賜命乃貢曰錫貢周有九貢皆不貴異物有常制也漢唐及宋開國之初恆詔蠲減郡國非時貢獻惟隋煬帝乃以禮餉豐薄爲黜陟循至唐德宗之日進宋徽宗

### 高平縣志

#### 卷四

食貨

#### 十四

之應奉明中葉之孝敬則征求無已官司倚法以削民黎民重困國朝貢有常品高平舊貢黃蠟三觔十三兩一錢二分有奇觔准價銀一錢五分脚價銀四分八釐故於地丁留支雍正六年停乾隆二十九年復貢旋止之令太原府屬邑獨采價輸司錫則舊貢二百八十四觔十一兩六錢四釐有奇增七十五觔七兩五分五釐觔准價銀九分亦於地丁留支銀三十六兩九錢五分三釐雍正十一年令舊貢錫者改貢好鐵錫一鐵二貢五百六十九觔七兩二錢九釐有奇觔准價銀四分五釐脚價銀二釐五毫觔分錫價銀二分二釐五毫充之不足者二分五釐請

諸司錫價所餘則輸之部乾隆三年並停好鐵之貢二十年仍貢錫三十四年復止價輸司而縣令私貼飯食銀八百二十兩七錢同輸司不少改平鐵故貢自江南改自雍正三年始舊貢二千一百觔九年增三千六十八觔初輸平定繼潞安十年始自澤州觔准價銀二分脚價銀二釐五毫取諸司不足者五分七釐五毫縣尹私貼之十三年停其貢價歸司而貼費銀一百八十兩亦同輸焉今減平輸司平鐵輸銀一百六十九兩二錢好鐵輸銀七百七十一兩四錢五分八釐而輸費復增矣 呈文紙舊貢一千一百七十張雍正年增貢二千三百四十張乾隆初停

高平縣志

卷四

食貨

十五

其增貢三十四年更增貢三千五百一十張張准價銀三釐脚價銀一毫二絲於地丁留支不足者亦由縣尹貼給之今仍 絲貢則有農桑絹素絹潞綢凡三農桑絹則歲貢黃絲六十五觔六兩增貢四觔十五兩五錢彙府解司太原府判司其織絲觔准價銀七錢府領之司給之縣自絲闕價昂縣尹亦私貼之素絹則年貢六十二疋絲凡一百二十四觔七兩九錢二分閏月增絲三觔十三兩八分觔准價銀五錢九分機匠廩食銀五錢三分不足者取補於縣尹復代鳳臺織絹十二疋陽城四十一疋陵川四十一疋沁水二十九疋絲觔廩食由府檄取之各縣徃徃逾

時不至高平獨干吏議貢費亦視他邑爲多焉

明季高平長治潞州衛綢機凡一萬三千餘軸十年三貢凡貢四千九百七十疋疋准價銀四兩九錢五分有奇長治貢十之六分二高平貢其三分八順治四年定爲歲貢三千疋時則機戶逃散潞州衛無一人長治高平綢機亦僅存一千八百戶機戶不能支訴諸部部允疋益廩食銀五兩有奇六年姜瓖亂杼軸毀工匠幾無子遺劉按臺嗣美疏減歲貢一千五百二十疋四丈八尺疋加廩食銀三兩十五年復減一千一百七十九疋二丈高平歲貢一百十四疋疋長六十八尺濶二尺四寸重六十一兩康熙六

高平縣志

卷四

食貨

十六

年復減大綢百疋改貢小綢四百疋疋長六托濶一尺七寸乾隆時定爲年貢大綢三十八疋疋長八十尺寬二尺四寸重四觔小綢一百十四疋疋長三十尺寬一尺七寸重一觔大綢疋准價銀十二兩五錢小綢准價銀二兩七錢五分貢之分數與昔同嘉慶十五年高平始減定貢大綢十一疋小綢二十疋機工歲領價於司縣尹增益其廩食而貢費之煩多猶爲疲焉外則伊犁綢輸必百疋疋長二丈一尺寬二尺今以亂止內務府綢王府綢則貢無定期疋無定式需則貢否則已貢必竭千金縣尹恒遷延以避焉抑今去姜瓖之亂二百餘年矣百族孳生流溢四境而



機軸僅六百有餘遠不逮勝國之末蓋逐末者多蠶桑之利微矣余里頌農桑政要書一復布種桑之課盜桑者重其罰亦願敦俗務本以衣被斯民返諸殷富焉爾

物產多他邑恆有者無奇珍穀則黍有青黑紅白四種通志云羊頭山其南陰地黍白以定黃鐘稷似黍而小色黃梁一曰蜀秫土人曰芟子有紅黑白三種穀曰小米有黃白青紅數種麥有大麥小麥別種曰蕎麥豆卽菽諺曰穀三千麥六十碗八扁二豉十一蓋豐稔之驗也麻有四果則葡萄胡桃雁過紅棗梨蔬則蘆菹萬苣白菜薤菜蒼蓮藤蒿山藥韭蒜草則紫蝴蝶剪紅蘿菊蓼芍藥牡丹木則

高平縣志

卷四

食貨

十七

松柏榆楊柳椿海棠尤宜桑米山諸鎮職蠶者多然惰民恆不種而盜取之且牧羊或踐食無餘槩非縣尹繩以重法莫或已也藥則白石英山查百合禹餘糧荆芥桔梗羽則雉啄木畫眉獸則狐獾狼豹貨則絲絹綢緞有曰雙線曰單線烏綾帕桑皮紙黃兒溝許庄諸村臨關水而業者百數十家石炭石炭無烟爲良鐵本草云高平爲尤勝畢振姬讀鹽鐵議曰生鐵伐鑛熾炭爲之鐵成而加薪乃熟熟可針刀耒耜鋤鑿鏃鏃釘鐻打作之屬利熟生可銃礮鐘鼎鍋鐺鑄作之屬利生生熟間爲錠爲鋼鋼又南北之鐵混鎔也可鋸可錯可鑿鑄且打之屬利生熟

常平倉始於漢之耿壽昌義倉始於隋之長孫平社倉亦始於隋歷代相沿或因或廢雍正初 詔舉之使司鍵得人歛散有法則豐凶皆劑矣故志稱明弘治知縣柳豸建預備倉萬厯知縣劉一相建經國堂三楹廩凡四十有餘知縣楊應中廢小書院爲義廩富戶輸粟稱貸於民今皆廢無餘矣縣治西北曰常平倉道光前者不論始自道光二十六年儲穀一萬六千石溢穀三石二斗六升二合五勺增儲當商輸穀三百十五石歲以給邑之孤貧凡二十一年食穀一千一百三十四石一斗五升同治六年存穀一萬五千一百八十四石一斗一升有奇自吏道訾窳大

高平縣志

卷四

食貨

十八

吏疑其侵盜凡升合出納必聞諸司司吏或持之以求賄而出陳易新之法廢粟恆腐敗不可食饑饉薦臻亦展轉請於上不獲命饑民嗷嗷睨而不得食焉當生死呼吸之際擠於溝壑又安得待千里論報以延一旦之命哉是又在良有司重民命而蠲成例者

社倉之興廢豈不以人哉縣舊有義倉四社倉四乾隆間增社倉四焉舊以倉長主之或非其人侵漁者多良而懦者又出不復納惟米山寺庄等倉以社首司之而獲完蓋社首逾年而易異於倉長父死子繼者矣今胥裁倉長一歸諸社因所存者春貸而秋收之歲取其息復舊額而止

復則五年一糶陳而易新薄收其耗焉道光十五年治平坊崇果院舊穀二千二百二石二勺今存一百三石三斗四合河西鎮舊穀七百二十一石六斗七升一合一勺今存三百一十四石五斗馬村鎮舊穀一千四百六十八石三斗二升七合七勺今存六百六十八石五斗野川鎮舊穀四百九十七石五斗七升九合一勺今存二百五十四石四斗詩村舊穀二百五十四石九斗八升八合今存一百七十九石七斗五合北陳村舊穀五百八十五石四斗四升今存一百五十二石八升七合王報村舊穀四百五十一石七斗五升今存二百八十二石赤祥村舊穀四百一十八石四斗八升今存八十四石三斗五升而米山鎮儲穀二千二百七十三石一斗寺庄鎮儲穀一千二百八十三石陳壩鎮儲穀四百八十三石二斗六升五合仙井村儲穀七百六十九石二斗三升皆以社首故不缺升合焉

天民之窮而無告者皆有常餼先王之仁也留養局始於乾隆初猶京師之有棲流所與五城粥廠歲於仲冬收孤獨窮民賑以食季春資而遣之知縣黃有恆恐其久而廢也置地六十一畝在府下里募傭耕之歲納穀十八石一斗五升高梁六石八升而以錢折入之養濟院額養孤貧

九名名月廩穀四石五斗歲三月開常平倉以賑之閉於仲冬不足三月則當商歲輸穀十五石准元銀二十四兩以爲補助云

豐年爲瑞反是則災矣苟無歲何有民春秋所爲災異必書而歷代五行有志也鳳凰麒麟王者不以嘉麻當之有以哉周則敬王四十三年丹水壅不流元王六年丹水三日絕不流威烈王五年丹水出反擊漢則永康元年秋八月己亥汝氏縣地裂考五行志曰五月丙午云魏則青龍元年夏五月神芝生長平之昔陽詔匱而藏之晉則太康元年春三月霜雹傷桑麥永甯元年冬十月乙亥風雹折

高平縣志

卷四

食貨

二十一

木元魏則太平眞君六年二月西幸上黨觀連理樹於汝氏周則武帝建德六年獲赤雀隋則文帝開皇元年二月辛巳獲赤雀唐則肅宗乾元二年秋不雨後周則世宗顯德元年春三月丙午有鵲巢於縣郊之南川宋則眞宗大中祥符元年秋七月甲子五龍躍於丹水大有年金則熙宗天眷三年夏五月庚申地震民驚死者數百皇統三年春三月戊子五龍復見於丹水歲稔如祥符八月嘉禾生元則至元二十二年夏大旱歷三月無雲盜賊蜂起成宗大德七年八月朔丁亥地震九月火公私廬舍災十一年夏四月庚戌地震三日明則永樂十二年秋八月朔甲子

靈雨害稼景泰元年秋八月戊午隕霜殺穀天順六年歲  
大饑斗粟千錢民易子而食成化十八年夏六月丁未大  
水故志曰有角而羊者鬪於金峯麓水暴漲幾沒城郭二  
十年大饑民多疫死人相食詔賑之弘治元年秋八月壬  
子大風折木八年蝗十二年夏旱秋澇正德八年夏五月  
嘗十三年秋丹水溢壞民廬千嘉靖二年春三月風麥苗  
偃五年冬十月己未地震十二年春三月癸丑雨雹大如  
輻冬十月乙亥初昏恒星不見夜中星隕如雨三十四年  
民亂嫁娶故志稱謊言采女童爲仙藥也三十七年夏四  
月羊頭山產靈芝入貢隆慶二年大有年萬曆二年秋八

高平縣志

卷四

食貨

二十一

月辛巳平頭里獲玉兔十年春二月換馬鎮北山鳴三日  
裂十一年春二月乙卯村民吳守倉妻一產三男十三年  
春三月丁亥地震夏五月壬寅雨雹大如杵十四年不雨  
至夏六月人多死詔賑之十五年大旱死亡如故夏三月  
丙辰夜雨雹二十四年冬十二月獲玉兔二十七年秋  
七月壬辰雨雹八月庚戌隕霜歲大饑二十八年夏六月  
雨雹大如拳畝盈尺三十年夏五月店頭村水地裂已而  
合三十一年秋七月唐安里雷震雨温如湯三十二年秋  
唐安里大雨蛟水壞民居三十五年春三月有星孛於西  
北夏四月星隕東平村有聲入地數十尺夏五月濟瀆池

水濁復清閏六月寒長河有霜四十二年秋九月地震有聲如雷四十五年秋九月彗星見至於冬十一月四十六年秋九月雪折木冬十二月日暈耳者再四十八年夏五月雨雹大如杵壞民居崇禎六年夏大疫冬無雪冬十月鷄鳩至故志曰體似雌雉鼠足無後趾歧尾不能樹棲性慫羣飛集若蝟毛北方沙漠產也十三年旱蝗大饑人相食 國朝則順治三年秋七月大水六年春正月雨雪大雷星隕夏四月地裂八年夏六月地震十三年夏大旱無麥康熙十九年秋八月雨雹損稼三十年夏六月旱蝗三十四年夏四月地震 詔賑給貧民三十八年閏七月大

高平縣志

卷四

食貨

二十二

風雹四十六年長平驛民李兆槃妻一產三男雍正七年夏五月雷雹歲仍稔乾隆二年秋七月雨雹九月地震五年閏六月雨雹七年秋八月雨雹九年夏六月雨雹十年秋七月雨雹十二年夏六月雨雹秋醴泉出石末河十四年石門村民李雙居沒於壑水六日不死十六年閏五月初大雨水 詔賑之十八年自七月不雨至於十月二十二年五月大風雨雹擊人二十二年二月風火旋如斗忽沒二十二年秋七月大風傷稼下沙壁地陷二十四年夏旱秋霽雨好蚘食禾二十六年夏六月火龍見石末三十三年夏有蚘三十六年唐安里窯自火自息三十八年十二

月寺庄鎮民張萬全妻一產三男四十七年三月村民司  
儒妻一產三男五十二年有麋鹿五十八年初寨村穀秀  
雙穎嘉慶七年秋七月旱八年旱如故九年夏五月雨雹  
大如卵六月不雨至於八月旱饑斗米元銀一兩二錢東  
社廟有鬻人市十年夏旱斗米千錢十七年秋不雨至於  
來年六月大旱二十年十二月村民趙允武妻一產三男  
道光二年秋七月霪雨害稼八年夏四月地震五月不雨  
至於六月始播種八月霜損稼九年夏四月雨雹大如孟  
十年夏四月地震十一年夏四月雨雹十四年八月不雨  
至於來年六月大饑斗米錢八百二十二年夏六月日食

高平縣志

卷四

食貨

二十三

既恆星見二十五年旱二十六年旱二十七年自五月不  
雨至於七月大饑人多死亡二十八年旱咸豐元年夏四  
月雨雹三尺許六月大雨河水溢二年夏四月雨雹深一  
尺秋九月槐再花三年正月風赤天無光四年正月天赤  
六年夏六月雨雹冬十二月大雪平地深數尺八年夏旱  
至於九年五月始雨秋八月隕霜十年夏六月雨村民程  
通聚爲雷擊不死左腋裂二寸許痕墨如釵股同治元年  
夏五月有白氣自東南至於西北六月蝗七月蝻孳生至  
十一月閏八月雨雹河水溢米山橘葉化爲蛇三年夏四  
月日無光五月水雨雹秋七月有衆星自東南流邱村穀

秀雙穎徘徊北村舊有火窯今四十餘年不滅是年於其左鑿一穴忽自焚鑿者已而上竟無恙四年夏四月雨雹秋禾頭生耳五年夏四月隕霜冬無雪六年春三月不雨至于五月余綜覽終篇喟然歎曰何唐宋以前災異之寡而晚近之多也毋亦後世吏治人心皆不古若其戾氣適以感妖孽與尚書考靈曜曰春政不失五穀孳夏政不失甘雨時季夏政不失地無菑秋政不失人民昌冬政不失少疾喪五政不失百穀稚熟日月光明守土者誠鑒於斯當惻然念民生之不易度亦勲勲於教養俾風俗龐古以消慝而召祥患至而始圖之抑末矣